



SIARAN MEDIA

BUKA EKONOMI, SOP KETAT, ELAK PKS TERUS KERUGIAN

Kuala Lumpur, 5 Ogos 2021 – SME Corp. Malaysia amat prihatin dengan keadaan Perusahaan Kecil dan Sederhana (PKS) yang kini sedang bergelut untuk meneruskan kelangsungan hidup. Langkah untuk membuka ekonomi secara beransur-ansur adalah penting bagi memastikan proses pemulihan PKS dapat dimulakan dengan segera. Walaubagaimana pun, pembukaan beberapa sektor ekonomi ketika pelaksanaan Perintah Kawalan Pergerakan (PKP) ini perlu mengambil kira beberapa aspek seperti kapasiti dan ujian saringan COVID-19 serta pelaksanaan program vaksinasi yang sudah dilaksanakan.

Menurut Ketua Pegawai Eksekutif SME Corp. Malaysia, Encik Rizal Nainy, *survey* yang telah dilakukan oleh SME Corp. Malaysia dan Kementerian Pembangunan Usahawan & Koperasi (MEDAC) mendapati bahawa sektor PKS amat terkesan dan mungkin tidak dapat bertahan jika perniagaan mereka terus ditutup sehingga bulan Oktober. Ini jelas terbukti pada tahun lalu di mana PKS telah menanggung kerugian sebanyak RM40.7 bilion berikutan pelaksanaan PKP yang menyebabkan kebanyakan perniagaan tidak dapat beroperasi seperti biasa.

Antara cabaran utama yang dihadapi oleh PKS jika perlu menutup perniagaan dalam jangka masa panjang adalah kekangan aliran tunai perniagaan serta gangguan rantaian bekalan. Oleh itu, PKS bukan sahaja memerlukan pembiayaan, tetapi juga perlu mempertingkatkan kemahiran, keupayaan dan kapasiti serta bimbingan.

Sehubungan itu, kerajaan telah memperkenalkan Pembiayaan Penguatan PKS (*SME Revitalisation Financing*, SMERF), skim pembiayaan di bawah Program Strategik Memperkasa Rakyat dan Ekonomi (PEMERKASA). Skim ini telah disalurkan melalui SME Corp. Malaysia dan dilaksanakan oleh MIDF untuk memudah cara PKS yang berdaya maju yang mempunyai kekangan kewangan dan sektor yang terpinggir. Melalui cara pembiayaan yang cepat dan fleksibel, skim ini dilihat dapat membantu mengukuhkan perniagaan PKS, menguruskan aliran tunai mereka dengan lebih baik, meningkatkan produktiviti dan sekaligus dapat mengekalkan pekerjaan.

SME Corp. Malaysia juga telah membangunkan portal MyAssist MSME, sebuah platform sehenti khidmat perniagaan dalam talian untuk membantu PKS menentukan hala tuju perniagaan dalam norma baharu dan berkembang maju dalam realiti pasca pandemik. PKS dapat dibantu dalam menguruskan isu atau masalah yang berkaitan dengan perniagaan mereka melalui penyediaan khidmat nasihat perniagaan dan maklumat kemudahan kewangan, fasilitasi perdagangan, sokongan teknologi, pepadanan perniagaan, peluang pemasaran digital serta penerapan e-dagang.

Inisiatif ini dilihat akan dapat membantu mempertingkatkan semula Keluaran Dalam Negeri Kasar (KDNK) PKS yang menguncup sebanyak 7.3% pada tahun 2020, yang terendah direkodkan sejak statistik KDNK PKS pertama kali diterbitkan pada tahun 2000.

- TAMAT -

Untuk maklumat lanjut atau sebarang pertanyaan, sila hubungi Pn Raja Rozaila Azman (rozaila@smecorp.gov.my) atau Encik Muhammad Ibrahim (muhammad@smecorp.gov.my).

Tentang SME Corp. Malaysia

SME Corp. Malaysia merupakan sebuah Agensi Penyelaras Pusat di bawah Kementerian Pembangunan Usahawan dan Koperasi (MEDAC) yang berperanan sebagai pusat pengumpulan dan rujukan setempat bagi maklumat dan khidmat nasihat Perusahaan Kecil dan Sederhana (PKS), penyelaras program pembangunan PKS, penilaian ekonomi serta pengakreditasi PKS, pembangunan perniagaan dan program sokongan, dan juga fasilitasi akses PKS kepada pasaran dalam dan luar negara.

Bermula pada 2 Mei 1996, SME Corp. Malaysia dahulunya dikenali sebagai Perbadanan Pembangunan Industri Kecil dan Sederhana (SMIDEC), bermatlamat membangunkan Industri Kecil dan Sederhana (IKS) Malaysia yang berkeupayaan dan berdaya tahan agar mampu berdaya saing di pasaran global. Pada tahun 2007, SMIDEC telah diberi mandat oleh Majlis Pembangunan PKS Kebangsaan yang dipengerusikan oleh YAB Perdana Menteri untuk menggubal dasar dan strategi menyeluruh bagi PKS dan memacu program PKS merentasi Kementerian dan Agensi. Sehubungan itu, SMIDEC telah dijenamakan semula secara rasmi sebagai SME Corp. Malaysia pada 2 Oktober 2009.

PERBADANAN PERUSAHAAN KECIL DAN SEDERHANA MALAYSIA (SME CORP. MALAYSIA)

**Tingkat 6, Blok B, Platinum Sentral
Jalan Stesen Sentral 2
Kuala Lumpur Sentral
50470 Kuala Lumpur**